











# MANIFESTE

OV

## DECLARATION,

DES EGLISES REFORMEES de France & Souueraineté de Bearn.

*De l'iniuste persecution qui leur est faiçte par les ennemis de l'Estat & de leur Religion. Et de leur legitime & necessaire defense.*

A LA ROCHELLE.

Par Pierre Pié de Dieu.

---

M<sup>o</sup> DC. XXI.

TESTIMONY

Case  
F  
39  
326

1621eg 2

ROCHESTER

...

...

...





# MANIFESTE

OV

## DECLARATION, DES EGLISES REFORMEES DE France & Souueraineté de Bearn.

*De l'iniuste persecution qui leur est faicte, par les  
ennemis de l'Estat & de leur Religion. Et de  
leur legitime & necessaire defense*



OV S Deputez en l'Assemblée Generale des Eglises Reformees de France & Souueraineté de Bearn, persecutees par les ennemis de l'Estat & de leur Religion, qui abusent des affections & de la conscience du Roy, voyans qu'à n'ostre grand regret nous sommes contrains par la violence de l'oppression de recourir aux moyens naturels & legitimes pour conseruer, par vne necessaire defense, la liberte de nos consciences & la seureté de nos vies: protestôs au nom desdites Eglises deuant Dieu & les hommes, de demeurer inuiolablement sous la tres-humble subiection & obeyssance de nostre Roy, recognoissans qu'il nous a esté donné de Dieu pour nostre Souuerain Seigneur. Et à fin que tout le monde puisse recognoistre que cōme ceste obeissance est, apres le seruice de Dieu le seul but de nos intériôs assez declarees par toutes les actiōs passees

de nostre fidelité, grauee aux colōnes de cēt Estat & aux courōnes de nos derniers Rois, & releuees par nos peres & nous de dessus les efforts des factions ennemies: aussi la haine & la persecutiō que nous souffrons maintenant n'est pour autre cause excitee par nos ennemis, que pour ceste affection veritable & saincte, à laquelle ils nous recognoissent inseparablement attachez par les enseignemens de nostre Religion, l'exemple de nos peres, & les interests de nostre propre conseruation. Nous supplions donc premierement le Roy, & tout ce qu'il y a de bons François, puis tous les Rois, Princes & Potentats, amis & allies de la Couronne, & generalement toutes personnes touchees de zele à la gloire de Dieu, de compassion de l'innocence foulée, & de desplaisir des miseres qui menacent aujourd'huy la France: d'entendre icy nos iustes plainctes, pour voir en icelles la perfidie & cruauté de ceux qui malgré nous les arrachent de nostre sein, & nous obligent de les publier pour la iustificatiō de nostre innocence, & pour enseigner à tous ceux qui aimēt la justice & la verité, que le refuge de la defence à laquelle nous sommes reduits est necessaire & iuste; nos ennemis n'estans poussez d'autre mouuement à mettre le feu dās ce Royaume, que pour esteindre nostre Religion, & pour abbattre la resistāce la plus ferme qui se peut opposer dās l'Estat aux entreprises estrangeres. Mais d'autant que par leurs artifices accoustumez, ils ont icy suyui la route ordinaire à la violence & cruauté qui a de coustume de se faire voye par la calomnie à l'oppression d'vne iuste cause. Et pour pretexte de nous courir sus, ils nous ont pu-



bliez rebelles & seditieux, employans, pour es-  
 pandre par toute cette accusation, les Edicts &  
 Declarations du Roy & des Parlemens, & la bou-  
 che mesme des Ambassadeurs es pays estranges.  
 Afin que la simplicité de ceux qui sont moins in-  
 formez, ou de la haine, ou du pouuoir, ou des arti-  
 fices de nos mal-veillans, ne recoiue quelque sini-  
 stre impression de nous touchant le deuoir d'o-  
 beyssance & fidelité enuers nostre Roy & nostre  
 patrie. Nous ferons voir icy que tous les pretext-  
 es, les crimes iniurieux qu'on nous impose, sont  
 artifices & desguisemens empruntez pour seruir  
 de voile aux outrages faicts à l'innocence. Ainsi  
 que pour allumer la haine des Rois, & la fu-  
 reur des peuples contre l'Euangile, on accusoit ia-  
 dis les premiers Chrestiens, & nos peres en ces der-  
 niers siecles, de semblables crimes. Qu'ils contre-  
 uenoient aux Decrets de Cesar, esmouuoient se- *Acte 17.*  
 dition entre les peuples, heurtoient la Royauté. 7.  
 Et sous ces accusations supposees, on leur a faict  
 souffrir par tout le monde la rigueur du glaive, l'ar-  
 deur des feux, la cruauté des massacres, la fureur des  
 guerres, & l'horreur de toutes sortes de supplices.  
 Il est vray que comme nos peres estoient plus es-  
 pars & descouverts ou exposez à vne plus facile  
 boucherie, on a imputé directement ces crimes à  
 la Religion, & puis on les a persecutez, on leur a  
 faict la guerre ouuertement pour la profession  
 qu'ils en faisoient. Auourd'huy par vn artifice  
 accommodé à leurs desseins nos ennemis, nous  
 changent de methode. Ils declarent la guer-  
 re aux personnes pour la faire à la Religion.  
 Et pource qu'apres tant de perfidies & de cruautés

le bras de Dieu nous ayant releuez comme des cendres de nos peres, & par vne miraculeuse prosperité du feu Roy, (conduit par nostre fidelité iusques sur le throsne de ceste Monarchie) les breches de l'Estat estans repacees, afin d'y establir vne ferme paix, on nous a donné vn Edict pour la liberté de nos consciences, & des seuretez pour mettre à couuert nos biens & nos vies, contre la violence que les maux passez nous faisoient craindre pour l'aduenir: ce seroit certes à present trop apparemment violer la paix, & se déclarer trop visiblement ennemis du repos de la France, si on reuoquoit ouuertement l'Edict faict en nostre faueur: si on nous declaroit la guerre pour nostre Religion. Ce seroit aussi interesser trop de personnes en vne mesme cause. C'est pourquoy pour couurir le dessein proietté de la ruine de cet Estat par la nostre, pour armer le Roy contre nous, & pour nous perdre avec plus de facilité qu'on ne croit autrement pouuoir faire. On nous a déclaré rebelles & criminels, on tasche de rendre ceste cause plus particuliere, on appelle la guerre qu'on nous faict vn chastiment de seditieux. Mais quand nous aurons exposé icy aux yeux de tout le monde, le dessein de ceux qui sont auteurs de ces troubles & confusions. La longue oppression que nous auons soufferte iusques icy en toute patience. L'euidence de nostre iustice au procedé que nous auons tenu enuers nostre Roy en nos plaintes & tres-humbles requestes, qu'on nous impute maintenant à crime. Et finalement la persecution ouuerte qui nous est faite à present par la voye des armes, ia leuees contre nous en tous les lieux de ce Royaume, où on



estime que nous pouuons faire quelque resistance. Nous esperons que nous mettrons nostre innocence à couuert de ces calomnies, rendrons approuuee la iustice & necessaire defense à laquelle nous auons recours en l'attente du secours & benediction du Tout-puissant. Et nous acquerrons la faueur & l'assistance de tous ceux qui ayment sa gloire & sa verité. Et l'ayde & le support de quiconque desire la conseruation & le salut de ce pauvre Royaume.

Depuis que le plus ferme appuy de l'Edit de nostre seureté, estably par la main puissante du feu Roy, tomba par le coup de sa mort, les ennemis de nostre Religion & de la paix publique, s'esleuans avec plus d'esperance de progres & de succez en leurs desseins, conuertirent tout leurs efforts à ietter par terre ce fondement de la tranquillité de l'Estat. Scachans que le plus asseuré moyen de ramener la confusion des troubles & des guerres passees, estoit de destruire l'Edict qui les auoit destruites. Mais ne se pouuans promettre que les bonnes inclinations du Roy & la sagesse de la Royne sa Mere lors Regente, & tout ce qu'il y a de bons François interessez en la paix du Royaume, consentissent ou peussent souffrir vne rupture ouuerte de l'Edict; ils ont cherché de gagner en detail ce qu'ils ne pouuoient obtenir en gros. Et par artifices & moyens plus couuerts faire tomber les choses dans le precipice, auquel ils les ont aujourd'huy iettees.

Le premier fondement de leur dessein se reconnut avec estonnement & iuste apprehension de tous les nostres, quand au Sacre du Roy on luy fit

*Dessein  
de nos en-  
nemis &  
les moyens  
d'y par-  
uenir.*



iurer ce serment. Je tascheray à mon pouuoir en bonne foy chasser de ma Iurisdiction & terres de ma subiection, tous heretiques denoncez par l'Eglise. Comme s'il prenoit sa couronne sous cette condition & sous cette loy, qu'il nous exterminerait quand il le pourroit faire, Le sang du Grand Henry crioit encor vengeance du furieux & abominable parricide, qui protesta & afferma n'auoir esté induit par autre raison à le tuer, que pource qu'il estoit fauteur d'heretiques, qu'il les souffroit en son Royaume, qu'il ne leur faisoit pas la guerre: Et voila qu'on faict promettre à son fils, à son successeur, qu'il emploiera toute sa puissance à les exterminer. Puissante & efficace le raison pour imprimer au cœur d'un Roy, dès ses plus tendres ans, la necessité de nous hayr & de nous destruire, que d'adiouster à la terreur de l'exemple du pere cruellement meurtri, pour auoir maintenu la paix à ceux qu'on appelle heretiques, la stipulation de regner & seoir sur le throsne apres luy, à la charge de persecuter ceux qu'il auoit conseruez. Car qui ne sçait que sous le nom d'heretiques ils ne veulent entendre que nous? Que nous sommes denoncez & qualifiez tels par l'Eglise Romaine. Et partant si le Roys'est deu croire obligé à l'observation de ce serment selon leur intention, que n'auons nous deu craindre dès lors? Pourquoi sur l'experience du passé n'auons nous deu apprehender derechef les malheurs sanglants que telles impressions & necessités imposees aux consciences des Rois nous ont faict espronuer? Ce mesme dessein de nos ennemis se manifesta encore ouuertement, quand pour faire passer en loy d'Estat & en maxime vniuerselle de conscience,

conscience, qu'il ne nous falloir plus souffrir en France; ils obtindrent aux Estats derniers tenus à Paris, que les Chambres du Clergé & de la Noblesse demandassent expressement par leurs cahiers l'exécution de ce serment du Roy, & la reception & publication du Concile de Trente. Concile auparavant reietté en pleins Estats tenus aux plus sanglans & violens troubles qui ayent esté excitez contre nous dans ce Royaume. Concile qui ne souffrent pas que les Rois regnent s'ils donnent vie & liberté en leur domination, à ceux qu'il a declarez heretiques.

Mais le plus apparent & le plus sensible progrez du dessein de nos mal-vueillans, s'est aduancé principalement par les Sermons seditieux des prescheurs Iesuites & autres Moines, qui depuis quelques ans par vne licence effrenece, & vne manifeste coniuration, se permettant contre le respect des Edicts & leur autorité, de prendre à tasche de les suggiller en leurs chaires & les rendre odieux, preschans la fureur & la sedition, nourrissent le peuple à nostre hayne, l'instruisent à nous auoir en execration, & luy soufflans la guerre & le meurtre dans l'esprit, le disposent & rendent preparé à toutes occasions de nous mal faire. D'où nous ressentons continuellement tant d'infractions des Edicts de paix, tant de bresches qui sont faictes à nostre seurété, tant de violences à nostre liberté. Neantmoins nous pourrions dire encores iusques là, que nostre patience auroit surmōté & cōme estouffé là pluspart de ces maux, ou du moins esperé que les remedes en fin nous en auroient esté donnez de la bonté du Roy, & de la sagesse de ses plus fi-



deles Conseillers. Si les Iesuites ne fussent iamais montez au comble de puissance ou ils sont paruenus. Car comme il est notoire que par toutes sortes de moyens violens, ils ont procuré iusques icy l'extirpation de nostre Religion, & la ruine de ceste Monarchie. Depuis que leur pouuoir est accru à l'egal de leur mauuaise volonté, & qu'ils voyent tous obstacles, cy-deuant opposez à ce qu'ils osoient entreprendre, maintenant abbatus ou ceder dessous leur puissance: quelle autre attente nous a esté reseruee que d'experimenter le danger ou de si long temps ils proiettoient de nous precipiter? La face miserable de la Chrestienté au iourd'huy presque toute deschiree de guerres & de confusions horribles represente assez aux yeux de tout le monde, quelle puissance ont eu leurs inductions artificieuses & meschantes, à exciter vne guerre de Religion tantost vniuerselle. Et qui peut presumer que la France (à laquelle ils ont desia tant de fois fait res sentir de si funestes playes de leurs mains meurtrieres) estant au iourd'huy liuree entre leurs mains & comme sous leur gouuernement absolu, pût seule euitier l'accident commun qu'ils ont fait tomber sur les autres Estats, ou leur credit & la diuersité de leur Religion leur ont donné pretexte & matiere de mettre le trouble. Il n'y a eu personne si peu instruite en leurs desseins qui n'ait cy-deuant preueu ou predict la misere & ruine de le France, deuoir arriuer lors que les Conseils des Iesuites y auroit le dessus. Et maintenant que d'un costé on les void en ce haut credit, & d'autre costé la France reduite aux malheurs d'une guerre civile: y auroit-il quelqu'un si aueugle qui n'y re-



cogneust l'œuvre de leurs mains ? qui en voulut chercher vne autre cause ou vn autre origine ? La crainte de tomber en ces maux , nous a fait ouyr plusieurs aduertissemens des plus sages & mieux affectionnez François, qui s'y sont long temps opposez de toute leur puissance. La vertu du Parlement de Paris à plusieurs fois opposé son autorité à leurs entreprises. Et les enseignemens remarquables, que son iugement respendit par toute la France, peu apres la mort du feu Roy , du danger & des pernicieuses consequences à l'Estat, s'ils empie-toient vn plus grand credit, guiderent la sagesse de la Royne Mere du Roy , pour ne laisser prendre plus de pied à leur audace dans la Court & au maniement des affaires. Ce qu'ils n'ont iamais peu durant la regence, & l'autorité qu'elle a eu en la conduite de l'Estat.

Mais comme tous changemens sont propres à ceux qui cherchent occasion de progrès, ayans rencontré au gouvernement suivant vn plus favorable support, comme ils sont accords à debiter l'vtilité de leur ministere, aydez de l'occasion, & soustenus par ceste main, se sont esleuez sur le pinacle du pouuoir ou nous les voyons estre montez. On vid lors le Iesuite le plus audacieux qui soit en toute la Societé introduit dans le Louure. Et d'vne temerité sans exemple se placer dans le logis de la sacree personne du Roy, à fin d'auoir toutes les heures & les moments de le gouverner en sa puissance. Et de là en auant à paru au gouvernement de l'Estat, quel pouuoir ont pris les Iesuites dessus les volontez du Roy. Par deux remarquables coups d'essay aussi tost apres l'introduction.

*Pouuoir  
des Ie-  
suites  
aujour-  
d'huy en  
France.*

de ce Iesuite, on put recognoistre que desormais rien ne seroit impossible à ceux de sa société de tout ce qu'ils voudroient entreprendre, pour eux, ou contre nous. La necessité de ce discours requiert que nous les representations.

Toute la France se peut souuenir que trois iours apres que ce Iesuite eut l'oreille du Roy, ils firent casser dans son Conseil l'Arrest du Parlemēt, par lequell'ouuerture de leur College dans Paris leur estoit interdite, iusqu'à ce qu'ils eussent ouuertement renoncé aux maximes de la ruine des Estats & du meurtre des Rois. Et pour monstrier que toute opposition à leur violence seroit desormais vaine, firent par vn Arrest du Conseil (par eux affiché à tous les carrefours de Paris en signe de triomphe) casser les Decrets de l'Vniuersité qui leur auroit voulu faire quelque resistance. De mesme facilité & en mesme temps ils firent donner l'Arrest en faueur des Euesques de Bearn, le 25. de Iuin 1617. pour la main leuee des biens Ecclesiastiques du pays affectez, par reestablissement solennel arresté par le Souuerain & les Estats, à l'entretien de nos Pasteurs, College, Garnisons, officiers & autres charges dudit pays. Quinze ans durant les Euesques auoient fait ceste poursuite auec toute sorte d'instance. Le feu Roy sollicité de Rome à diuerses fois en leur faueur, scachant les cōsequences d'vn tel changement, obligé aussi par son serment propre à ne rien innouer ( outre la liberté de l'exercice donnée aux Catholiques Romains, & la restitution d'autant de biens Ecclesiastiques qu'il leur estoit necessaire, accordée par Edict & executée dès l'an 1699. ) les en auoit touf-



iours refusez. La Royne Mere du Roy pour sem-  
blables considerations, & pour l'obligation de pa-  
reil serment iuré par sa Majesté à present regnante  
pour l'entretien de l'establissement ancien (confir-  
mé d'ailleurs par douze patentes & Declarations  
obtenues contre l'instance que les Euesques fai-  
soient du contraire) n'y voulut point toucher. Le  
dessein de nos ennemis ne pouuoit recevoir plus  
d'auancement que par vn coup de cette nature.  
Car ils scauoient que l'execution de cette main-  
leuee entraineroit (comme hélas ! il est arriué) la  
subuersion du pays, & la ruine totale de nostre re-  
ligion en iceluy, avec esperance que du feu qu'ils  
y allumeroient ils embraseroient toute la France.  
C'est pourquoy ils engagerent le Roy par sa con-  
science, & par la leçon de son serment touchant  
l'extirpation de la Religion contraire à la sienne, à  
faire donner cet Arrest d'autorité absoluë. Du-  
quel pour cette cause (quoy que donné precipi-  
tamment sans prendre aduis des principaux Offi-  
ciers de la Couronne & ministres de l'Estat en vn  
faict de telle conséquence, & contre les formalitez  
de iustice sur la seule poursuite des Euesques, sans  
ouyr les Deputez du pays) on n'a iamais peu obte-  
nir la reuocation, nonobstant toutes remontran-  
ces & supplications qui en ayent esté depuis pre-  
sentées, ausquelles on n'a rien respondu, sinon  
que l'autorité & la conscience du Roy y estoient  
engagees. Or de là prisme nous vne triste expe-  
rience des mouuemens du Roy és affaires plus im-  
portantes à son Estat & à nostre conseruation.  
Voyans que ce Iesuite tenoit toutes ses affections  
liees par des respects de religion. Et que la deuo-



tion à laquelle sa Maieſté par vne bonté nce avec elle eſt naturellement portée, eſtoit comme vn reſſort à ſa conſcience par lequel il encline toutes ſes volontez à ce que bon luy ſemble. Il ſ'eſt eſtabli pour conſeil de la conſcience du Roy, comme il parle. Et en ce conſeil peut-il propoſer autres maximes que celles de Rome? qui toutes ſe peuuent reduire à ce ſommaire de la ſubuerſion de cet Eſtat & de noſtre ruine. Luy donne pour loy la deciſion du Concile de Conſtance. *Qu'on ne doit point garder la foy aux heretiques.* Que quelques Edicts qu'il ait faits ou iurez ne l'obligent point. Que partant il peut, ains qu'il les doit rompre. Ou pour l'induire il ne luy repete autre leçon que celle du ſerment de ſon ſacre. Ne luy propoſe vn plus grand merite pour le loyer du paradis que l'extirpation des heretiques. L'incite à rechercher par là vn renom plus glorieux que celui de S. Loys, pour auoir faiſt la guerre aux infideles. Tels & ſemblables ſont les Conſeils de conſcience de ce Ieſuite. Aufquels ſa Maieſté, poſtpoſant toutes autres conſiderations de ſon Eſtat, ſ'eſt laiſſee perſuader, & à dire ſouuent, *Qu'il vaut mieux perdre ſon Eſtat, que ſon ame.* Comme enſeignée à tenir pour maxime qu'il y a des occasions de ſauuer ſon ame en perdant ſon Eſtat. Or de la poſſeſſion des volontez du Roy encloſes de cette ſorte en la main des Ieſuites ils ont entraîné à eux par vne ſuite neceſſaire tout le gouuernement de l'Eſtat, Ce qu'ils ont obtenu avec tant plus de facilité que tous les ſages & anciens Conſeillers & Miniſtres qui ont fidellement ſerui le feu Roy & la France, à eſtabliir & maintenir la proſperité & grâdeur ou elle ſ'eſt

veu esleuee sous son regne, estans maintenāt comme nous voyons reculez de tout maniment des affaires : ceux à qui l'abondante faueur du Roy donne toutel'autorité au gouuernement, consentent volontairement que la conduite du conseil, soit entre les mains des supposts de Rome, Cardinaux & Euesques. Et ceux qui y sōt demeurez ou qu'on y a introduit de nouueau, les vns nourris du leuain des vieilles factions & affectiōs d'Espagne, les autres gagnez par les aduantages des liberalitez de de celle-cy, ou des honneurs de Rome ( dont les Iesuites sont principaux banquiers ) concourent tous en vn mesme consentement où il y va de la destructiō de tout ce que le feu Roy auoit estably, mais principalement en ce qui nous concerne. Et ces allechemens ont eu tant de force, que tel de qui les meilleurs auoient attendu vne inuariable vertu à l'affectiō de la paix & des bonnes maximes, par l'esperance d'vne grandeur Ecclesiastique s'est deuoué pour instrument de la premiere breche, par laquelle la persecutiō a couru sur nous. D'autre costé les Cours souueraines & subalternes, & toutes les Magistratures du Royaume sont remplies de personnes qui leur sont asseruies, ou par superstition, ou par interest de fortune. Les peuples ne suiuent autres mouuemens que ceux ou ils les portent par leurs predications, ou par leurs confessions secretes.

Telle est donc la puissance de nos ennemis nous en auons aussi, à nostre dommage, resenti les effects par vn traictement tout contraire à celuy que nous auons dessus le feu Roy. Car depuis qu'ils ont cette autorité ( nous pourrions dire depuis leur

*Les man  
uais  
traite-  
mens qui  
nous sōt  
faits.*



regne) il ny a plus de faueur ny d'accez à la Cour pour ceux de nostre Religion. Plusieurs à qui les seruices de leurs peres & les leurs auoient conserué iusques là l'honneur de quelque charge pres du Roy, s'en sont veus reculez. La pluspart sont obligez à s'en desfaire sous ce commandement. *Changez de Religion ou quittez vostre charge.* On leur dit que le Roy ne peut voir de bon œil les Huguenots aupres de sa personne. Nous auons dans le Conseil nos plus animees parties pour iuges, & ennemis iurez ceux que nous allôs supplier. Nous sommes exclus d'entrer aux charges dans toutes les Cours souueraines ou subalternes contre la liberté des Edicts. Si quelqu'un de ceux qui en sont ia pourueus se range à nostre Religion, les Procureurs generaux ou leurs substitués s'opposent à sa seance. Les Chambres luy contestent & les repoussent. Et combien y en a t'il en la Cour de Parlement de Paris & ailleurs, qui sont retenus de venir à nous par l'oppression de cette liberté? Mais quand aurions nous raconté toutes les sortes d'injures qui nous sont faictes? Les insolences seditieuses qui se commettent iournellement pour empescher l'exercice libre de nostre Religion és lieux où il nous est permis. Les attentats & entreprises contre les places qui nous ont esté baillees en garde pour nostre seureté. Les practiques secretes pour desbaucher les Gouverneurs d'icelles, comme il est arriué de nouveau és personnes des gouverneurs de Clermont de Lodeue & d'Argenton. La restitution de ces places à laquelle on nous refuse de pouruoir. Les excez & outrages que souffrent és villes & aux champs ceux de nostre Religion



gion par la fureur du peuple excité par ses Predicateurs. Les rauages & bruslemens de nos temples & cimetieres. Les inhumanitez exercees au detrement de nos morts, ou pour leur empescher la sepulture. Les violences faictes aux consciences des malades, mesmes en l'agonie de la mort pour les contraindre de renoncer à leur religion. La cruauté exercee contre les pauvres & malades qu'on iette hors des hospitaux. La force pratquee en l'enleuement de nos enfans pour les nourrir en la religion Romaine contre l'intétion de leurs peres & de leur derniere volonté. Bref, toutes manieres de torts & de violences nous sont faictes contre l'autorité du Roy, repos & tranquillité publique. En tous ces maux nostre seul recours est en nos plaintes, que nous adressons continuellement aux Magistrats, ou dans les Prouinces, ou dans les Cours Souueraines. Mais c'est helas ! ou au lieu de remedes nous trouuons le poison. Car non seulement renuoyez sans obtenir droit sur nos requestes ; mais l'iniustice de laquelle ils aggrauent l'iniure precedente, augmente l'audace de ceux qui nous ont fait le mal, encouragez par l'impunité & par la Loy qu'ils prennent de l'exemple des iuges mesmes.

Nostre dernier refuge est en la iustice du Roy & vers les Ministres del'Estat, où comme pour l'insupportable traitement que nous receuons de tous endroits nous recourons ainsi qu'à nostre asyle : aussi est-ce d'où nos ennemis font le plus violent effort de nous empescher l'accez. Ils voyent que la protection du Roy nous tiendrait couuerts contre toutes leurs iniures. Ils scauent que la

*Procedé  
senu par  
nous en  
nos plain  
tes qu'on  
nous im-  
pute au-  
iour-  
d'huy à  
crime.*



voye de nos plaintes, que la nature ouure à vn chacun, nous conduiroit sous l'abry de sa iustice, où nostre repos & la tranquillité publique seroient conseruez. Pour ceste cause nous experimentons d'eux en cet endroit vne plus animeuse coniuration. Car non seulement ils bouchent l'oreille de sa Majesté & nous ferment toute entree vers elle, mais lorsque nous y voulons aller par nos tres-humbles Supplications & requestes ils nous tendent, par vne fraude plus que diabolique, le laqs de leur calomnie pour nous faire tomber au blâme d'une pretendue rebellion & desobeissance. Ils changent nos plaintes en crimes, ils nous appellent seditieux & rebelles. C'est l'accusation pour laquelle ils nous poursuient criminellement. C'est, l'accusation pour laquelle ils nous persecutent au iourd'huy. Nous appellons ici le Ciel & la terre à tesmoin entre nos ennemis & nous, desirans que la procedure de nos plaintes enuers sa Majesté, que nous exposerons ici veritablement & au long, estant recogneue de tous, on iuge de nostre innocence, & de la calomnie de l'accusation, & finalement de l'iniuste guerre & persecution que nos haineux nous ont suscitée sous ce pretexte.

Afin d'entretenir l'Edict de paix & reparer les infractions d'iceluy, le feu Roy voulut selon son equité establir vn ordre au milieu de nous, par lequel nous pourrions de temps en temps sous sa permission & octroy nous assembler par Députés de toutes les Prouinces, pour luy presenter nos plaintes sur les griefs qui nous seroient faicts, & remporter de sa bonté les responses raisonnables & necessaires pour l'entretienement des Edicts.



Suiuant cet ordre ressentans vne plus pressante necessité que iamais, nous estans adressez à sa Majesté par nos Deputez generaux en l'annee mil six cens dix neuf, elle eut agreable d'octroyer à nostre tres-humble requeste vn breuet portant permission de nous Assembler en la ville de Loudun au 25. de Septembre. Où nous estans trouuez de toutes les Prouinces du Royaume & de la Souueraineté de Bearn, les cahiers de nos plaintes estans dressez, nous les presentasmes en toute humilité à sa Majesté, la suppliant que par vne fauorable response aux principaux articles & plus importants griefs, nous peussions remporter dans toutes les Prouinces, par les tesmoignages de sa bonne volonté à nostre protection, dequoy rassurer tous ses suiets de la Religion, contre tant de menaces & de craintes dont ils se voyent environnez. Ce ne seroit iamais faict si nous voulions estaller icy le subiect de toutes ces plainctes. Nous en toucherons seulement quelques vnes pour en faire voir l'importance, & la necessité d'obtenir sur icelles vne prompte iustice.

*Assemblée de  
Loudun.*

Nous nous pleignons que Leytoure place de seureté nous auoit esté rauie d'entre les mains. Que deux des nostres pourueus d'offices de Conseillers en la Cour de Parlement de Paris, n'auoient peu obtenir leur reception durant trois ans continus qu'ils la poursuiuoient. Que l'exercice de nostre Religion banni de Clermont de Lodeue place de seureté, sur le reestablissement d'iceluy poursuiuy par nous, on s'estoit opposé avec armes à l'exécution d'un Arrest du Conseil du Roy. Que nos Temples auoient esté bruslez ou demolis à Bourg



en Bresse, à Moulins en Bourbonnois, & à Leval pres Guyse. Qu'à Baux en Prouence le sieur de Vere Capitaine du Chasteau apres plusieurs menaces & violences, pour defendre & empescher l'exercice à ceux de la Religion, les auroit finalement chassez hors de la ville par force, & avec main armee le 8. de Feurier 1620. Qu'on n'auoit peu obtenir iustice des excez outrageux faicts à quelques vns de la Religion à Baugenci, & du toxain sonné sur eux, & de ce que les coupables qui auoient precipité deux hommes du haut du grenier, & percé l'un à coups d'espee, ont esté ouys en tesmoignage aux informations qui ont esté faites par le Lieutenant general en la iustice d'Orleans, & que nonobstant le renuoy de la cause au Parlement de Paris, le Procureur general en icelle n'a tenu compte d'en faire poursuite.

Que nos Pasteurs auoient esté chassez violemment hors des villes de Bourges & de la Chasteigneraye. Que plusieurs personnes faisant profession de la Religion à Chaalons sur Saonne en auroient esté chassées & exilées, comme aussi du Duché de Barrois. Que les lieux à nous accordez pour l'exercice de la Religion pres des villes de Lyon, Dijon & Langres nous estoient empeschez. Qu'es lieux ou les habitans sont en possession d'y faire ledit exercice depuis les annees 1596. 1597. ou partant ils ont par l'Edict toute liberté, ils y sont troublez, comme à la Chasteigneraye, à la Chastre, à S. Cyprian, la Herle, Velus, Maussac, Langon, bourg de Códé en Normandie, à Agiene en Viua-rests, à S. Marcellin en Forest, à la Chaulme en Xaintonge par opposition formelle des Officiers,



à Florence Picusqué, Montfort & Puget par les Consuls, près la ville de Perigueux, à Montignac Charente, par sentence du Seneschal d'Angoumois sur peine de mille liures. Que l'education des enfans estoit ostee aux peres de la Religion pour les instruire en la Religion contraire, comme au sieur le Maistre M. des Comptes à Paris, & Par Arrest de la Cour de Parlement de Rouen, en la cause d'un nommé Couurechef. Que plusieurs enfans de la Religion auroient esté enleuez par des Moynes. Comme à Ambrun le fils d'un Bourgeois, à Millaud le fils du sieur Valette, à Leytoure un enfant aagé de dix ans nommé François Aram, par le Iesuite Regour le 4. Iāuier 1620. Que nos sepulchres estoient inhumainemēt violez, ou les sepultures empêchées en plusieurs lieux, cōme à Aix en Prouëce, à Gordes, à Mirebeau, à Ongle, à Xaintes, à S. Georges d'Olerō, & en plusieurs lieux de la Guyenne & autres endroits avec cruauté & barbarie. Que nos pauvres malades estoient chassez des Hospitaux, ou forcez contre leurs consciences, comme en la derniere contagion à Paris, en l'Hospital S. Louys ou plusieurs y furent violentez, & tout accez denié aux Ministres & Anciens pour les consoler. Que les Parlemens au preiudice des Chambres establies s'attribuoyent la cognoissance de nos causes, comme le Parlement de Bourdeaux plusieurs fois, & particulièrement au fait des habitans du Mas, d'Aginois, qui en ont souffert de tres-grādes vexations, dont plusieurs d'iceux sont morts en prison. Mais principalement es causes criminelles, comme le Parlement de Thoulouze, lequel ayant condamné Jean de Nasses Greffier de



Montauban à l'amende honorable, n'a voulu def-  
 ferer aux Arrests du Conseil, portans renuoy en la  
 Chambre de Castres. Et encor ledit Parlement de  
 Bordeaux en la cause des habitans de Tartas, qui  
 en la surprise du Chasteau ayans esté cruellement  
 traitez, outragez & chassez, auroient esté pour-  
 suivis & mal menez audit Parlement, lequel sur la  
 recrimination des mutins & seditieux, auroit re-  
 tenu la cognoissance de la cause au preiudice de la  
 Chambre de Nerac. Au Parlement d'Aix quanti-  
 té des nostres auroient esté cruellement retenus  
 en prison plusieurs années, nonobstant leur causes  
 renuoyees & retenues en la Chambre de Greno-  
 ble suiuant l'Edict. Nous demandions encore que  
 le changement fait és villes de Montault, Vareil-  
 les, Tarascon, Montgaillard au Comté de Foix  
 (esquelles rien ne doit estre innoué suiuant le bre-  
 uet de 1598.) fust réparé. Qu'il pleust au Roy nous  
 octroyer le breuet de la garde des places de seure-  
 té, avec la deliurance de l'Estat des places de Dau-  
 phiné. Faire reuoker l'Arrest de main-leuee des  
 biens Ecclesiastiques de Bearn. Faire rendre la vil-  
 le de Priuas entre les mains des habitans, & leur  
 rendre iustice sur les excez violences & outrages  
 qu'on leur auoit faits. Outre vne infinité d'autres  
 plaintes publiques & particulieres trop longues à  
 deduire. En toutes lesquelles nous esprouuasmés  
 le pouuoir de nos ennemis si grand, que toute iu-  
 stice nous y fut desuiee, & ne remportasmes pour  
 toute response qu'un commandement absolu de  
 nous separer.

Mais comme l'urgence du mal & la necessité du  
 remede, nous fit recourir plusieurs fois vers la Ma-



jesté. Nos haineux commencerent lors de qualifier nostre instance & très-humble supplication reiterée, du tiltre de rebellion, pour nous oster l'esperance de toute iustice, pour nous rendre odieux & pour ouvrir la porte à vne guerre & persécution obtindrent de faire publier vne communion de crime contre nous (comme si c'estoit crime de se plaindre) menaçans tout haut nostre perseuerance, des armes du Roy, & faisans verifier extraordinairement des Edicts burfaux dans les Parlemens pour la necessité des preparatifs à nous faire la guerre. Le Roy neantmoins par la bonté de son naturel, & la force de son inclination à iustice, eschappant aux contraintes de nos ennemis, nous fit promettre par la bouche de Monseigneur le Prince & de Monsieur de Luyntes à present Con- nestable, qui donnerent leur parole à Messieurs de Lesdiguières & de Chastillon pour nous en assurer. Qu'après nostre separation dedans le terme de six mois du iour d'icelle, la ville de Leytoure nous seroit rendue, les Conseillers receuz au Parlement de Paris. Le breuet de la garde des places de seureté & l'estat de celles de Dauphiné nous seroient deliurez. Et le surplus de nos cahiers respondus fauorablement, & les responses executees de bonne foy, & que dans sept mois du iour de la separation, les Deputez de Bearn seroient ouys sur ce qu'ils voudroient remonstrer à sa Maiesté. Et en cas que ces promesses ne fussent executees dans le tēps, nous pourrions nous retrouver ensemble, pour demander derechef à sa Maiesté iustice sur nos plaintes. Or d'autant que la condition de ces promesses, des assurances sous lesquelles on nous

*Promesses données à Loudun avec permission de se rassembler dans six mois en cas d'execution d'icelles.*



les fit valoir, & de la bonne foy promise en l'exécution d'icelles, depend la iustification principale de nostre procedé suiuant, pour lequel nous sommes iniustement declarez criminels & traitez par la rigneur des armes. Que tout le monde voye icy sur quel fondement a esté appuyé la bonne foy en laquelle nous sommes, & le droit que nous auons eu de nous r'assembler. Pour confirmation de la promesse qui nous en fut faite, on nous représentoit que c'estoit la premiere parole que le Roy eust donnée à ses sujets de la Religion, depuis qu'il tient le gouuernail de son Estat. Monsieur le Conestable adioustoit que la sienne y interuenüe nous vaudroit breuets, & peut estre encore d'auantage. Le Roy de sa propre bouche le confirma depuis à Fontainebleau aux Deputez qui l'aduertirent de nostre separation, en presence de Monseigneur le Duc de Lesdiguieres qui nous en auoit donné l'assurance. Or nous eust-il esté loisible de desirer ou de nous figurer quelque autre permission plus valable que la sacree parole du Roy, la premiere qu'il nous eust donnée? Le papier & l'ancre ne peuvent adiouster de poids ny d'autorité aux paroles des Rois. Et certainement nous eussions creu estre indignes de la grace de nostre Roy, & iniurieux à son autorité, si nous eussions requis cette permission sous vne plus grande seureté que sa parole. Ainsi nous estans separez le 13. d'Auril de l'année derniere, apres vn acte dressé entre nous de nostre obeyssance, contenant toutes les conditions & promesses susdites, avec ordre donné à ceux de la Rochelle de faire la conuocation, le cas estant escheu, au lieu qu'ils iugeroient le plus commode.



commode. Les Deputez s'estans retirez & ayans rendu compte dans les prouinces, furent continuez ; ou d'autres subdeleguez à eux ; pour se trouuer ensemble, en cas d'inexecution des choses accordees suiuant la condition des promesses. Cela s'est faict en toutes les Prouinces publiquement au sceu de sa Maiesté & de Messieurs de son Conseil. On nel'a point trouué mauuais. Le Roy ne fit aucune Declaration contraire. Cependant il est tres-certain qu'es'il y auoit eu quelque entreprise ou attentat contre l'autorité du Roy, ce seroit en la nomination des Deputez ; mais comme elle estoit recognué legitime par la permission, la conditió pendéte, aussi nos Deputez generaux faisans la poursuite de l'exécution des choses promises, n'ont point faict doubte de l'accompagner tousiours de ceste remonstrance vers Messieurs du Conseil. *Faites nous iustice & ne nous donnez point la peine de nous rassembler.* Monsieur le Prince mesme estant allé plusieurs fois au Parlement pour y faire verifier la iussion du Roy sur la reception des Conseillers, leur representa la permission de nous rassembler, à quoy par leurs refus ils donnoient occasion.

Or le temps prefix des six mois pour l'accomplissement des promesses escheant au treiziesme d'Octobre sans qu'elles eussent sorti effect, le Roy s'estant acheminé en Guyenne au mois de Septembre, fust sollicité par nos ennemis de faire inoction à ceux de Bearn d'executer main lenée, & au Parlement de Pau d'en verifier l'Arrest. Le terme accordé pour leurs remonstrances, que sa Majesté auoit promis d'entendre par la bouche de leurs

*Executio  
de la  
main le-  
uee en  
Bear. an  
ticipée,  
& le cha-  
gement  
fait au  
pays en  
la sure-  
té & li-  
berte de  
la Reli-  
gion.*

Deputez, s'estendoit iusques au 13. de Nouembre;  
 Ce qui fit que sur la iussion du Roy, le Parlement  
 de Pau donna Arrest par lequel il ordonna que les  
 Deputez feroient leurs remonstrances à sa Maiesté  
 dans le temps qui leur estoit accordé (confirmé  
 derechef par lettre escrite le vingt & vniesme  
 Septembre par sa Majesté audit Parlemen) autre-  
 ment ledit temps passé l'Arrest de main-leuee de-  
 meureroit verifié. Sa Maiesté non contente de cét  
 Arrest & sans attendre les remonstrances de ceux  
 du pays, est poussé par nos ennemis à s'y achemi-  
 ner. Et nonobstant que le Parlement par autre  
 Arrest de verification pure & simple, eust preuenu  
 la venue de sa Maiesté elle ne laissa pas par l'indu-  
 ction de nos haineux d'entrer dans le pays avec  
 son armee. Nous nous tairions icy volontiers de la  
 desloyauté de nos ennemis, & des cruautéz y exer-  
 cees par leurs inductions. Si leurs accusations ca-  
 lomnieuses & la douleur cuisante de nos miseres,  
 ne nous obligeroient maintenant d'auoir la bou-  
 che ouuerte pour nostre iustification, & pour en  
 crier vengeance deuant Dieu & les hommes. Nous  
 ne parlerons point du changement faict au pays  
 par l'vnion à la Couronne de France, encore qu'il  
 soit euident qu'elle n'a pas tant esté faicte pour au-  
 cun aduantage de la France, que pour plus de lieu  
 à l'alteration de nostre Religion. Nous touche-  
 rons seulement en peu de mots ce qui a esté faict  
 directement pour ruiner la liberté de l'Euangile.  
 Le Roy donc estant à Nauarreux, & voulant con-  
 seruer au sieur de Sales la promesse qui luy auoit  
 faict donner dès Bordeaux, & confirmée dans le  
 pays, de le maintenir au Gouuernement de la ville,



à ce conuié encores par les longs seruices dudit  
 sieurs de Sales, & par la prompte obeyssance qu'il  
 tesmoignoit par toutes sortes de deuoirs à sa Ma-  
 iesté nonobstant ce, pressé par nos ennemis de luy  
 oster le Gouuernement & le donner à vn Papiste,  
 mais retenu par la Religion de ses promesses, le Ie-  
 suite qui est aupres de luy interposant son conseil  
 de conscience (ou plustost sans conscience) persua-  
 da à sa M. qu'il luy estoit loisible de fausser sa pro-  
 messe, par vn equiuoque & distinctiō vrayement  
 digne de l'indignation de Dieu & des hommes.  
*Vostre promesse, dit-il, Sire, est d'Estat ou de conscience.*  
*De conscience, dit-il, elle ne peut, car elle est contraire*  
*au bien de l'Eglise: Estant donc d'Estat, vostre Maieité*  
*doit croire ses Conseillers, qui luy remonstrent que pour*  
*le bien de son seruice il importe que ceste place ne soit plus*  
*entre les mains d'un Huguenot.* Ainsile Roy induit  
 par le Maistre de sa conscience qui se fait garant  
 pour luy enuers Dieu de tout ce qu'il fera par son  
 conseil, fit commandement au sieur de Sales de se  
 demettre de son gouuernement, donné à l'instant  
 au sieur de Poyane ennemi iuré de ceux de nostre  
 Religion. Puis ayant fait retirer la garnison de  
 la ville, & desarmé les habitans, il y fut mis quatre  
 cens soldats Papistes sous le commandement du-  
 dit sieur de Poyane. Cela fait pour oster tout ce  
 qui restoit de seureté à ceux de la Religion, les six  
 Capitaines des Parfians furent cassez, & les villes de  
 Sauueterre, Orthez, Olerō & Naï remplies de gar-  
 nisons Papistes. Le Roy estant de retour à Pau, donna  
 la presidence aux Euesques dans les Estats y cōuo-  
 quez, pour leur dōner par ce moyē l'autorité prin-  
 cipale dans le pays. Et Dieu vucille qu'il n'experi-

mente encore d'eux la mesme perfidie qui en chassa son pere en son enfance. Et que les pratiques de l'ennemy voisin ne trouuent en eux la facilité à luy donner l'accez dans la France par cette porte, ou la fidelité des nostres à tousiours seruy de rempart. Or afin qu'il ne restast rien où la seureté & liberté de nostre Religion ne fussent violees, les Papistes furent faicts maistres de tous les Temples ou s'en faisoit l'exercice, quoy que la condition de la mainleuee mesme portast cette reserue, que les Temples demeureroient aux nostres tandis qu'il leur en seroit pourueu d'ailleurs. Tous ces changemens se faisans en haine de nostre Religion, & comme pour la bannir hors du pays, l'audace de tous ceux qui sont nourris & incitez cōtinuellement à à nous mal faire en creut de telle sorte, qu'au lieu que le respect de la presence du Roy les deuoit retenir, leur licence au contraire desborda si auant, qu'en tous les lieux où ils mirent le pied, nos Temples ne peurent estre garantis d'infinis rauages & scandales, iusques là que dedans Pau mesme (le Roy y estant) ayant brisé la chaire & les bancs du Temple, on y brusla publiquement la Bible & le Nouveau Testament. Les Ministres en diuers lieux furent outragez, & plusieurs personnes contraintes contre leurs consciences à s'agenouïller aux processions. Le surplus des insolences, violences & excez que ce pauvre pays ressentit est innombrable, & tel que les plus cruels ennemis auroient peu exercer au milieu d'une terre conquise. Là dessus pour triomphe, Arnoux fait vn liure intitulé, *Le Roy en Bearn*, où ne se pouuant tenir de ioye de voir ses desseins si aduancez, donne claire-



ment à cognoistre iusqu'où il pretend qu'ils se doiuent estendre. Nous enseigne quelle suite nous en deuons attendre. Le Roy à son compte ne doit cesser iusqu'à ce qu'il ayt esteint la Religion qu'il abhorre. Et le haut esleuant pour ce commencement & pour la suite du dessein, au dessus du feu Roy son Pere, laisse à sous-entendre que la mort de ce bon Roy luy ayant esté aduancee pour le refus qu'il auoit faict d'en venir iusques là : Sa Majesté doit auourd'huy attendre d'eux vn plus favorable traittement à la charge de continuer.

Le Bearn reduit en ce miserable estat, le Roy s'en retournant laissa vne partie de son armee en Guyenne, & espendit le reste par le Poictou, remplissant toutes nos Eglises d'effroy. Et de là en auant on n'oit parler que de la ruine des Huguenots. Tout le discours de la Cour n'est que du siege de la Rochelle. On dit qu'il n'y en a pas pour trois mois, qu'on n'attend plus que la saison commode. Cependant toutes les promesses faictes à Loudun estans negligees, le temps passé sans qu'il y en eust rien d'accomply (hors la deliurance du breuet de la garde des places) quelque instance qu'en eussent faite nos Deputez generaux durant tout ce temps; la conuocation des Deputez nommez par les Prouinces (& obligez de se reünir pour represéter leurs requestes à sa M. sur l'inexecution des choses promises) se fait par la ville de la Rochelle qui les y assigne au 25. de Nouembre. Nous ne voulons point obmettre qu'apres les changemens faits au Bearn, la ville de Leytoure fut remise à vn Gentil-homme de la Religion, mais nous remettons à iuger à toutes personnes equitables, si

vne garnison Papiste y ayant esté laissée, & contre  
 l'ordre du gouuernement precedant de la ville, vn  
 Lieutenant establi, lequel mesme n'a iamais eu ap-  
 probation du Synode de la Prouince, suiuant le  
 desir du breuet du Roy de la garde des places de  
 seureté: la bonne foy a esté obseruee en ce poinct  
 comme elle y auoit esté promise. Nous remettons  
 à iuger encore, si apres que toutes les seuretez d'un  
 pays nous ont esté arrachees, ce chef des promes-  
 ses executé de la sorte & tous les autres negligez &  
 demeurez sans accomplissement, le droit de nous  
 plaindre d'une contrauention si manifeste, & de  
 ces nouueaux griefs si cuisans & de tous les autres  
 qui restoiēt, a cessé, si la necessité en est diminuee  
 & si l'accez & la liberté nous en ont deu estre inter-  
 dits. Telle estant donc l'importance des raisons de  
 nous rassembler, & de recourir promptement en  
 toute humilité à la iustice du Roy, comme nous  
 en auons permission, neantmoins à peine estions  
 nous encore tous rendus en ce lieu, qu'on fit pu-  
 blier vne Declaration pour nous rendre criminels,  
 denonçant ire & iugement de condemnatiō con-  
 tre les conuoquans & les conuoquez. Mais cepen-  
 dant autant que nous sentons que le mal nous  
 presse; que nos consciences nous interpellent  
 d'accomplir la charge que nos Eglises nous auoiēt  
 donnees, que nous y auons en sincerité le tesmoi-  
 gnage de proceder avec iustice. Nous nous met-  
 tons en deuoir de presenter au Roy nos tres-hum-  
 bles remonstrances pour nous purger des fausses  
 accusations & des crimes dont nos ennemis nous  
 chargeoient, abusans de l'autorité de son nom  
 pour destruire la verité de la parole qu'il nous



auoit donnee. Lui faire entendre l'vrgente necessité de nos iustes plaintes. Le requerir en toute humilité qu'il luy pleust deliurer nos Eglises de tant d'allarmes & d'espouuantemens dont elles se voyoient de tous costez enceintes. En somme se monstrer nostre protecteur contre vne si violente oppression qui nous est faicte par tout son Royaume au preiudice de l'autorité de ses Edicts, & contre les menaces ouuertes de nostre ruine, que l'exemple des maux du Bearn rendoient si formidables. Mais nous trouuons que nos ennemis auoient bouché les oreilles de sa Maiesté à toutes nos requestes, qui sont reiettees sans qu'on veuille rien receuoir ny entendre de nostre part. Et en mesme temps on procede dans les Parlemens & Bailliages criminellement contre nous. On menace cette ville & nous de guerre ouuerte comme rebelles & seditieux.

Or là dessus iugeans par l'experience du passé, & à la methode de nos ennemis, en laquelle nostre dommage ne nous auoit desia rédus que trop scauans & experimentez, que cette accusation & ces menaces se faisoient pour autoriser vn refus & dény de iustice, & nous faire perdre toute esperance de rien obtenir à l'auenir en nos plus iustes & necessaires plaintes, nous insistons à plusieurs fois en la iustification de nostre innocence, & perseuerons à supplier, & à ietter aux pieds de sa Maiesté nos tres-humbles requestes. Mais comme tout accez nous est interdit, & que pour charger nostre procedure de haine, mesmes à l'endroit des nostres, & pour faire naistre des diuisions parmi nos Eglises, nos ennemis faisoient donner quelques paroles à

nos Deputez generaux & à plusieurs autres d'entre nous, que le Roy, resolu de ne rien ouyr de nostre part, vouloit neantmoins traitter fauorablement les suiets de la Religion & leur rendre iustice. Qu'il entendoit volontiers leurs plaintes par les Deputez generaux & sous le nom des Eglises. Pour experimenter quel effect auroient ces paroles nous intermettons toute poursuites en nostre nom, & nous retenons dans le silence, la remettons entiere à nos Deputez generaux pour la faire en leur nom & au nom des Eglises. Et certainement nous ne craindrons point d'adiouster que si l'estat de nos maux croissans de iour en iour, & menaçans de pis, n'eust accru nostre apprehension & nostre iuste desfiace, vaincus de tant de chagrin, de rebuts, de menaces, & de desespoir de tout succez, nous n'aurions eu p'us grand desir que de nous retirer, & peut estre que nos Eglises nous l'eussent pardonné. Mais en mesme temps la fraude de nos ennemis s'est descouuerte plus auât, & la persecution proiettee contre nous esclattant en diuers endroits, a manifesté leur dessein par tant de perfidies & de violences, qu'estans maintenant obligez pour la iustification de nostre innocence & de nostre defense legitime cōtre la guerre, qu'ils nous font, d'estaller ici leur procedure aux yeux de tout le monde, nous douterions pour l'honneur de la France de publier des faicts si odieux, si en mesme temps on ne recognoissoit que ceux qui en sont auteurs sont les vrais ennemis & ont coniuéré sa ruine avec la nostre.

Premierement, sous l'apparence de ces belles promesses, que le Roy vouloit entretenir les Edicts  
faicts



faicts en faueur de ses subiects de la Religion, & leur donner contentement sur leurs plaintes des contrauentions faictes à iceux, on attire à la Cour Monsieur le Duc de Lesdiguières par l'esperance que son entremise contribueroit à obtenir ce contentement, & sous ceste mesme assurance on entretient tous les autres seigneurs qui sont parmi nous, & les personnes plus considerables. Cependant en mesme temps Monsieur de Montmorenci leue les armes contre nous en Languedoc, & apres plusieurs actes d'hostilité commis, attaque Villeneuve de Berg que nous tenions en Vinarez. Et comme il estoit aisé à preuoir que cette violence trouueroit de l'opposition, on y enuoye de la Cour le sieur de Reaux Lieutenant des gardes du corps, portant en apparence commandement de faire desarmer tout ce qu'il trouueroit armé. Monsieur de Chastillon (de qui la prudence & l'affection au seruice du Roy & à la paix de son Royaume auoit retenu iusques là l'impatiēce des peuples desireux de repousser la force qui leur estoit faicte) ayant esté aduertit de la charge dudit sieur de Reaux par vn archer qu'il luy enuoya, continuē d'arrester l'esmotion des nostres, & comme il attend des nouuelles plus particulieres dudit sieur de Reaux & de l'obeissance de Monsieur de Montmorenci au commandement qu'il portoit, Villeneuve le Berg qui auoit desia repoussé deux escalades & tous les efforts qui auoient esté faits à la porte, s'estant renduē au seul nom du Roy, entre les mains dudit sieur de Reaux, & soub-mise à sa protection & sauue-garde, Monsieur de Montmorency y estant entré y establit garnizon, qui à l'in-

stant mesme y commet toutes sortes d'excez & d'outrages. Sur ce les nostres ayans esté induits à s'armer pour la defiance de telles fraudes, & pour la necessité de leur defense. Le sieur de Reaux estant venu trouuer Monsieur de Chastillon, & sous l'esperance qu'il luy donne que Villeneuve de Berg seroit renduë, & par l'esperance que selon les conuentions du traitté accordé entr'eux, toutes choses seroient restablies en paix, ayant obtenu qu'il desarmeroit; ainsi qu'il y satisfaisoit de bonne foy, Monsieur de Montmorency au lieu d'y obeyr de sa part, loge cinq ou six compagnies dedans Villeneuve de Berg & y fait proclamer à son de tambour le sieur de Peraut pour gouverneur, & de plus ayant deliuré plusieurs nouuelles commissiōs, dattees du l'endemain que ledit sieur de Reaux estoit arriué aupres de luy, il assiege Vals autre place de Viurets, tenuë par les nostres, ou mesme ledit sieur de Reaux, cependant que Monsieur de Chastillon se reposoit sur sa parole, de faire accomplir le traitté à Monsieur de Montmorency, assistoit luy mesme en personne & estoit spectateur de la batterie. Cette place petite & foible n'ayant rien que ses habitans apres auoir enduré cent coups de canon, s'estant renduë à composition honorable, contre la capitulation expresse, toutes sortes de cruautez violences & barbaries y ont esté exercees sur vne infinité de pauvres personnes innocentes cruellement meurtries ou violees. Et contre la foy du mesme traitté, le semblable a esté encore fait en suite à Valons autre place voisine. Ces fraudes & contrauencions aux traittez simulez, manifestent à tous que la parole du



Roy & son commandement apparent, n'ont esté employez que pour seruir de piege à nostre bonne foy & pour donner occasion, lous vn adueu tacite de tout ce que Monsieur de Montmorenci feroit au contraire, à nous faire perdre ces places.

En mesmetemps encore le sieur de Poyane s'estant fortifié dans le Bearn pour en chasser Monsieur de la Force, on enuoye de la part du Roy le sieur de la Saladie à Monsieur de la Force pour luy faire commandement de cōgedier quelques troupes qu'il tenoit pres de luy pour sa seureté, & pour maintenir l'autorité du Roy en sa charge au gouvernement du pays, contre les entreprises violentes dudit sieur de Poyane. Mais ledit sieur de la Saladie au lieu de remporter la respōse de Monsieur de la Force au Roy, comme il faisoit semblant, est allé par la Guyenne porter commandement d'armer à Messieurs d'Espernon, de Vignoles & a plusieurs autres, d'où nous auons veu à l'instant la Guyenne toute remplie d'armes, outre celles qui y auoient esté auparauant laissées.

D'autre costé nous auons veu en ce mesme instant les troupes laissées dans le Poictou s'auoisiner des enuirōs de cette ville & de S. Ieā d'Angely. Et par vn Arrest du Conseil tous les Bureaux des receptes transferez de toutes les places de nostre seureté où ils estoient establis, argument sensible, qu'encore que la seule ville de la Rochelle fust menacée, ou en vouloit neātmoins à toutes les autres, & d'un dessein de guerre generale contre nous formé & proche; Cette translation ne se faisant pour autre cause que pour nous oster le moyen, la

4

persecution ia resoluë suruenant, de nous ayder de ces commoditez pour nostre defense, preuue par consequent qu'on se preparoit de nous y reduire.

Or comme par ces alterations nouuelles à nostre repos, ces menaces, l'oppression & la persecution ouuerte en tant de lieux, nous preuoyons assez l'orage qui nous panchoit sur la teste & prest à esclatter, recognoissans encore que nos ennemis enfléz du succéz rencontré au ravage & desolatiō du Bearn n'auoient attendu depuis, que la saison commode de continuer nostre ruine par vne guerre ouuerte, ayans de cela prou d'enseignemens par les propos qu'on auoit tenu ouuertement, au retour du Bearn, du siege de la Rochelle, des moyens & de la facilité de la prendre. Par les discours qu'à toutes heures on tenoit au Roy de la ruine des Huguenots. Par les calomnies qu'on nous suscitoit pour en auoir pretexte, par les menaces que nous en entendions, & par les apprests qui s'en faisoient visiblement. Neantmoins sous les paroles qu'on donnoit de la bonne volonté du Roy enuers ses subiects de la Religion & à l'autorité de ses Edicts, nos Deputez generaux à l'entremise desquels toute la poursuite estoit remise, presenterent à sa Majesté vn cahier de plainctes pour auoir reparation sur quelques griefs des plus importants, & d'une plus prompte & necessaire execution pour le repos & la seureté de nos Eglises.

Mais apres plusieurs instances & remises, apres diuerfes sollicitations & prieres de tous ceux qui tiennent les premiers rangs entre nous, mesme de Monsieur le Duc de Lesdiguières present à la



Cour, nos Deputez generaux n'ont iamais peu obtenir aucune response. Seulement Monsieur de Fabas l'un d'iceux, & un Gentil-homme de la part de Monsieur le Duc de Lesdiguières estant venu vers nous, & nous ayans fait entendre conformément à un escrit de Mondit sieur de Lesdiguières signé de sa main. Que pour tout contentement sur tant de plaintes, Monsieur le Duc de Lesdiguières se promettoit (car le Roy, quoy qu'on fist esperer à nos Eglises qu'il vouloit entretenir ses Edicts, ne donnoit pas mesme icy sa parole ny de sa bouche, ny par aucun ministre de l'Estat) que moyennant nostre separation prealablement effectuée, on obtiendrait la retraite des troupes des lieux ou elles nous donnoient quelque defiance. Que l'estat des places de Dauphiné seroit cherché pour nous estre deliuré dans six mois, au cas qu'il se trouuast. Qu'il seroit pourueu pour ceux de Bearn au remplacement des deniers accordez au lieu des reuenus Ecclesiastiques. Que Monsieur de la Force & ses enfans seroient laissez en leurs charges. Et au surplus que parole tres asseurée luy auoit esté donnée que rien ne seroit entrepris, attendant le temps qu'il conuiendrait pour auoir nos resolutions. Mais comme nous vaquions à icelles, nous eusmes aduis par Monsieur Chalas, l'autre de nos Deputez generaux, que le lendemain & contre lesdites promesses nos ennemis auoient porté le Roy à resoudre absolument & ouuertement la guerre contre nous. Et à faire le departement d'une armée de quarante & un mille hommes de pied & de six mille cheuaux. Et que la charge de Monsieur de la Force du gouuernement

de Bearn auoit esté donnee à Monsieur le Mar-  
chal de Themines, & celle de Capitaine des Gar-  
des qu'auoit Monsieur le Marquis de la Force son  
fils, donnee à Monsieur le Marquis de Mauny, &  
que Monsieur de Monpouïllan vn autre de ses fils  
auoit eu commandement de se retirer de la Cour.

En ce mesme temps comme nos ennemis ha-  
stoient nostre persecution par toutes sortes de  
moyens, les predications seditieuses, l'instruction  
des confessions, les libelles diffamatoires, les ca-  
lornies & impostures contre nostre fidelité, l'im-  
pression de la haine du Roy contre nostre Reli-  
gion, & les declarations de guerre publiques contre  
nous produisans leur effect, est arriué en la ville de  
Tours le 19. d'Auril qu'un nommé Martin le Noir  
peu auparauant conuertý à nostre Religion, pour  
raison dequoy il auoit souffert plusieurs iniures &  
conuices, iusques là que le peuple ayant faict vne  
effigie de paille, & l'appellans tantost de son nom,  
tantost de Martin Luther, l'auoit publiquement  
bruslee, sans qu'on ayt iamais peu obtenir iustice  
d'une insolence si outrageuse: estant lors decedé  
ainsi qu'on le portoit en terre, le peuple s'estant  
mutiné apres auoir seu sur son corps & ceux qui  
le portoient au sepulchre, apres auoir commis tou-  
tes sortes d'indignitez & d'inhumanitez au deter-  
rement d'iceluy, cherchant à faire pis, esmeut vne  
plus violente sedition, & ayant abbattu & demoli  
vne maison proche du cimetiere, court au Tem-  
ple esloigné de là d'un quart de lieuë, y met le feu,  
entre dans la maison du Concierge, la pille & la  
saccage, & estant accreu iusqu'au nombre d'une  
effroyable multitude, demeure trois iours entiers



à continuer l'embrasement & la demolition du Temple sans que le Magistrat y interuint, où qu'y interuenant trop tard, il ayt peu suffire à reprimer vne violence si enragee. De la l'exemple de cette sedition passe incontinent en la ville de Poictiers, ou le peuple poussé de pareille fureur, à demoli de fôds en combie les murailles du cimetiere ou ceux de la Religion enterrent leurs morts, rompu & brisé toutes les tumbes, & prest à commettre vne semblable violence contre le Temple, si le Magistrat plus soigneux n'en eust arresté le cours.

Or toute la suite des conseils & des actions de nos ennemis iusques-là, & principalement ces funestes & espouuentables esclandres, ces grands preparatifs de guerre, l'iniustice & rigoureux traitement fait sans cause à Monsieur de la Force & à ses enfans contre les assurances tout fraichement donnees du contraire, avec les armes toutes prestes sous le commandement de Monsieur d'Espernon pour l'inuasion de Bearn, tesmoignoient & donnoient assez à cognoistre quel heure d'une persecution generale estoit venue, & que le dessein ia long temps formé de nostre ruine estoit esclos. Pour ceste cause nos ennemis, afin que leur perfidie peust iouer leur ieu & faire son effort, font promettre d'un costé que le Roy feroit faire iustice de la sedition de Tours, & afin de leuer ailleurs les defiances, ou pour endormir les plus confidens, font verifier en tous les Parlemens vne Declaration du 27. d'Auril, portant que le Roy voulant chastier quelques-vns de ses subiers de la Religion (qu'on appelle rebelles & seditieux) vouloit & promettoit d'entretenir ses Edicts, à tous

ceux qui demeureroient en son obeyssance, les maintenir & conseruer en toute liberté & seureté suivant le contenu des Edicts. Et finalement font donner assurance à M<sup>r</sup>. de la Force, que quittant le Bearn, & en donnant aduis à M<sup>r</sup>. d'Espernon, on luy feroit commandement de se retirer. Or voycy quel a esté l'effect de ces promesses. Nous commencerons par le dernier chef qui a esté le premier violé. Monsieur de la Force s'estant retiré, & ayant donné aduis à Monsieur d'Espernon de son desarmement & de sa retraite par le sieur Baron d'Arros, incontinent apres Monsieur d'Espernon est entré avec son armee dans le pays, s'est saisi de toutes les villes & places ou ceux de nostre Religion estoient en plus grand nombre, les a remplis de fortes garnizons, razé le Chasteau de Montanay, & reduicts tous les nostres à vn si deplorable estat que la plus part, voire les principaux ont esté contrains de s'enfuir, d'abandonner leurs biens & leur pays, avec meurtre de plusieurs personnes desarmees & sans deffence, & les autres demeurent à present retenus sous vne miserable seruitude, souffrans toutes sortes d'iniures & de cruautéz. D'autre costé le Roy s'auançant pour l'exécution des menaces publiees contre ceste ville, apres auoir respandu par tout ces assurances qu'il n'en vouloit point au general de ceux de nostre Religion, & donné particulieres promesses aux gouuerneurs de quelques places de nostre seureté, qu'entrant en icelles il n'y innoueroit rien, ayant passé par Tours ou la sedition s'estant renforcee, & le Commissaire enuoyé pour l'exécution de la iustice, chassé dehors, les prisonniers tirez des prisons par violence,

les



les maisons des nostres ( qui par l'effroy du premier tumulte s'estoient retirez ) pillées & saccagees , à peine la seule reuerence du Roy violée a esté expiée par le supplice des cinq miserables belistres. Et cela encore pour entretenir la credulité de ceux qu'on voudroit repaistre d'opinion que l'entretènement des Edicts seroit continué. Sa Majesté est venue à Saumur où Monsieur du Plessis, sous les promesses expresses qu'on luy auoit donnees que rien ne seroit changé au gouvernement , & sous la foy de la Declaration publiee trois sepmaines auparauant, ayant ouuert les portes de la ville & du Chasteau au Roy, a faict l'essay à nostre grand dommage, des fraudes & perfidies de nos ennemis, qui ont induit le Roy à luy oster le gouvernement, & a mettre vne garnison de 400. soldats de ses gardes dans le Chasteau, & vn autre dans le fauxbourg de la croix verte, & par ce moyen nous faire perdre ceste place de seureté. Avec quelle horreur & indignation toute la France peut-elle voir que les ennemis de son repos & du seruice du Roy abusent ainsi perfidement de son nom & de sa parole, pour commettre des desloyautez si detestables? Il n'y a que dix mois que par breuet expres de sa Majesté la garde des places de seureté nous a esté continuée pour quatre ans. Entre toutes, la ville de Saumur estoit vne des plus importantes à nostre seureté. Elle estoit en nos mains depuis que le feu Roy estant Roy de Nauarre appellé par le Roy Henry troisiésme à son secours, vint suivi de ceux de nostre Religion pour le deliurer de la captiuité & de la tyrannie de la Ligue, on luy donna cette ville pour le passage, & elle demeura deslors en nos

mains pour marque de nos bons seruices, & de nostre fidelité à cette Couronne. Cette place sise sur la Loire estoit pour nous seruir, aux persecutions & aux confusions que les ennemis de cet estat esmeuent aujourd'huy, de retraite ou de passage commode à tant de pauures troupeaux descouverts, pour se sauuer de la furie des feux ou des glaines qu'on leur prepare. Cette ville durant le repos des années passées à serui de pepiniere à l'Eglise, & estoit le logis d'une Academie florissante. Pour ces causes la cruauté de nos ennemis a poussé le Roy à nous commencer la guerre, en laquelle ils le precipitent contre nous, par vne playe si cuisante, que pour nous faire avec plus de facilité toutes les calomnies precedentes, tous les pretextes de desobeissance & rebellion, toutes les Declarations particulieres contre nostre Assemblée & cette ville, toutes les Declarations & promesses frauduleuses en faueur de ceux qui demeureroient en l'obeissance du Roy ont esté employees. Car pourroit-on bien dire que Monsieur du Plessis, de qui personne n'ignore les longs & fideles seruices rendus au feu Roy & à sa Maiesté à present regnante ait commis quelque desobeissance & rebellion: Ains n'auoit-il pas mesme passé toute mesure de confiance en la desloyauté de nos ennemis pour le respect du seul nom du Roy? Et estimât destourner de dessus sa teste l'orage duquel il voyoit vne partie des nostres ouuertement menacez, auoit luy-mesme publié le benefice de cette trompeuse Declaration, & pour en faire la premiere espreuve ouuert au Roy avec tant de confiance les portes de la ville. Aussi le masque leué en cet endroit,



on n'a plus fait de doute de monſtrer qu'on en veut à tout le general. Car auſſi toſt que le Roy a eſté à Saumur on a eü nouuelles du deſarmement qui ſ'eſt faiſt de tous ceux de la Religion par toutes les principales villes de la Normandie, ceux-là eſtoient ils auſſi criminels, ou depuis la Declaration ont-ils commis rebellion ou deſobeiſſance? Qui plus eſt comme le Roy eſtoit à Saumur, le ſieur Arnaut eſt allé à S. Iean d'Angely le iour de Samedi 15. du preſent, portant commandement à Monſieur le Duc de Rohan & à Monſieur de Soubize d'aller trouuer ſa Maieſté, comme deſirant auoir leur aduiſ pour accommodement des affaires preſentes. Ceci ſe faiſoit à deux fins. L'vne, à fin que pour l'eſperance de quelque iuſtice, les grands & les peuples de noſtre Religion fuſſent retenus comme ils ont eſté iuſques à preſent, tandis qu'on diligentoit de toutes parts ôtre nous les preparatifs de la guerre. L'autre principale & plus proche, pour couvrir la deſiance ou le ſoupçon des troupes du Roy conduites par Monſieur d'Auriac, qui le lendemain ſ'eſtant ietté dans les faux bourgs de S. Iean avec trois mille cinq cens hommes, attaqua la ville, & fit effort iuſques dedans les portes pour y entrer & la ſurprendre d'auſſaut, ſ'il n'y euſt trouué reſiſtance. Cette ville eſtoit elle criminelle? la pouoit elle eſtre que ces Seigneurs ne le fuſſent? Et cependant le Roy eſcrit à Monſieur le Duc de Rohan, comme le recognoiſſant fidele & affectionné à ſon ſeruiſſe & gouuerneur & ſon Lieutenant en la Prouince du Poictou, ce qui ne ſe feroit pas à vn rebelle & deſobeiſſant. Quelle autre crime a donc commis cette ville pour eſtre inue-

stie & menacee de siege, & reduite comme elle est à present, à attendre deuant ses murailles le canon du Roy & son armee qui s'auance en diligence pour l'assieger. Quel crime à commis encore la ville de Iargeau autre place de seureté, qui en mesme temps a esté inuestie, autre que le crime qu'on a iuré de ne nous pardonner pas? que la haine de nostre Religion dont ils ont coniuré la ruine?

C'est ce que nous proposons deuant les yeux de tous les François, & non seulement d'eux, mais de tous les Chretiens que nous appellons icy pour iuges de nostre inuocence, & de la violente persecution que nous souffrons inuictement. Et encore que le precedent recit veritable des procedures de nos ennemis contre nous, & des nostres enuers nostre Roy, donne assez à cognoistre la calomnie de l'accusation par laquelle ils nous publient rebelles & desobeyssans, toutesfois pour ne laisser aucun ombrage qui puisse allier de nous la faueur du iugement equitable des gens de bien, leur cōpassion de nos miseres: & leur secours, du besoin de nostre defense necessaire & iuste: il nous est aysé de faire voir qu'il n'y a en nous ny soupçon ny apparenced du crime de rebellion qu'ils nous imposent. La à Dieu ne plaie qu'aucun estime que les plaintes, que la violence de l'oppression extorquee de nous, regardent nostre Roy, auquel nous recognoissons & reuerons de tout nostre cœur l'image de Dieu icy bas. Mais si reietans sur ceux qui abusent de ses affections & de sa conscience l'iniustice dont nous nous plaignons, nous voulions dire quels, eux-mesmes sont qui nous accusent, toute la France qui gemit opprimee sous l'insupportable



faix de leur tyrannie, tesmoigneroit pour nous que nous ne le dirions point par reccrimination ny par calomnie. Mais il suffira pour nostre innocence de nous purger de l'accusation. Or ils nous accusent d'estre rebelles & desobeyssans, & de heurter contre l'autorité du Roy. Graces à Dieu la Religion que nous auons au cœur, & que nous auons declaree par vne solemnelle Confession presentee à nos Rois, pour leur tesmoigner avec la pureté du frenice que nous rendons à Dieu, nostre sincerité à leur obeyssance, nous a ia long temps deschargez de ce blasme. Nous ne recognoissons aucune puissance en terre superieure à celle de nostre Roy. Nous n'auons point de serment à d'autre. Nous detestons toute doctrine qui enseigne que directement ou indirectement nous puissions estre déliez de celuy que nous auons iuré à son obeyssance. Et à la profession sainte de ces enseignemens, se rapportent aussi toutes les actions & de nos peres & de nous. Où s'est-il trouué d'entre-nous, qui ait trempé le cousteau detestable dans le sang de nos Rois, qui ayt ioint son glaue à celui de l'ennemy de la France pour deschirer ses entrailles? Ains apres tant de mortelles playes qu'elle en a receu cy-deuant, Dieu s'est-il pas serui des bras de nos peres pour la releuer comme du tombeau? Et aujourd'huy que la mesme coniuration se renouë, que ceux qui ont iuré haine mortelle à nostre Religion & par vne esgale fureur se sont deuouiez à la ruyne & destruction de tous les Estats de la Chrestienté, & particulièrement de cette Monarchie, tenans le cœur & les volonteiz du Roy comme en leurs mains, dependantes des sugge-

sions qu'ils font à la conscience, l'induisent à met-  
 tre son Estat en hazard pour nous perdre : nous  
 osons dire que le temps & l'experience luy feront  
 encor recognoistre qu'il n'a rien de plus ferme en  
 son Royaume pour l'appuy de sa Couronne que  
 nostre fidelité. Et certainement il n'est rien de plus  
 exposé aux yeux de tous ceux qui nous considerēt,  
 que de recognoistre que les interets de nostre  
 conuersation sont inseparablement attachez au re-  
 pos & à la paix de cette Couronne, & à l'affermis-  
 sement de l'autorité de nostre Prince. Il est indu-  
 bitable que selon les moyens humains dont Dieu  
 se sert pour l'aduancement de son œuvre, la con-  
 seruation & accroissement de nostre Religion en  
 ce Royaume, dependent de la liberté & seureté  
 des Edicts sous lesquels nous viuions ; l'entretien  
 des Edits, de l'autorité absoluë du Roy. Tes-  
 moin en soit le regne heureux de Henry le Grand,  
 lequel comme Dieu eust esleué en puissance & au-  
 thorité absoluë plus qu'aucun des Rois de la Chre-  
 stienté, aussi auons nous veu lors sous la prosperité  
 & grandeur de cette Monarchie, nos Eglises fleurir  
 & se replanter, & l'Euangile fructifier avec tant  
 de succez, que nos ennemis en creuans de despit  
 n'ont cessé iusqu'à ce qu'ils ayent perfidement rai-  
 à la France ce Roy si absolu. Et encore auourd'huy  
 que pour pretexte de nous courir sus & faire la  
 guerre à nostre Religion, ils nous ont accusez de  
 desobeyssance, auons nous faict autre chose que  
 de nous plaindre de l'autorité du Roy & de ses  
 Edits violez & d'en demander le restablissement ?  
 Et en cela ya t'il quelque ombrage de rebellion  
 contre nostre Prince ? Nous nous sommes assem-



blez pour luy demander iustice. Manquions nous de necessité ou de droit de le faire? Nous l'auons cy-dessus iustifié par l'estat de nos maux, & la qualité des promesses qu'on nous auoit donnees. Auons nous outre-passé les loix de la plainte? Si refusez, nous auons recouru plusieurs fois, & plusieurs fois essayé de ietter nos tres-humbles requestes aux pieds de nostre Roy. Hé! qui peut treuuer mauuais, ou blasmer que nous faisons enuers nostre Roy, image de Dieu en terre, ce que Dieu nous commande que nous faisons vers luy? Et pour estre demeurez ensemble, plusieurs Deputez de toutes les Prouinces, insistans de remporter de la grace du Roy, l'effect de ses bonnes volonteiz enuers nous, est-ce point vne maligne & iniurieuse chicanerie, que pour authoriser vn desny de iustice on nous accuse de donner ombrage à l'autorité du Roy? Et pour vn specieux exemple du refus qu'on nous fait, on allegue que les Estats apres la presentation de leurs cahyers, se retirent sans attendre la responce. Mais qu'auons nous de commun avec des Estats? Toutes nos demandes sont particulieres. Nous ne demandons pas de faire des reglemens dans l'Estat, ou de nouuelles Ordonnances, en quoy certainement l'autorité Monarchique seroit diminuee ou partagee, si les Estats y contribuoient autrement que par leur aduis. Mais tout ce que nous demandons est, que des Temples bruslez nous soient reparez, que l'exercice de nostre Religion empesché nous soit restably, que des villes ostees de nos mains en la garde desquels le Roy les a commises nous soient restituées. Que des Officiers soient receus. Des enfans arrachez

par force des bras de leurs peres leur soient rendus & autres choses semblables. En quoy l'autorité du Roy est-elle blessée, s'il nous octroye sur le champ que iustice en soit faicte? Si le particulier à qui l'iniure est faicte en peut iustement demander & attendre iustice du Roy, pourquoy si l'iniure est faite en haine du public, au public ne sera t'il pas permis le mesme? Ainsi y a t'il rien de plus inique que de nous auoir accusez de rebellion & de desobeyssance pour nous estre plaints, & pour auoir demandé iustice en cette sorte? rien de plus cruel que de nous persecuter pour cette cause & nous faire la guerre? Mais c'est assez pour recognoistre que les pretextes recerchez par nos ennemis sont artifices colorez pour executer le dessein de long temps coniuré de faire la guerre à nostre Religion, & de ietter la France en confusion & en trouble.

Partant si on considere la iustice & la necessité pressante que nous auons eu de recourir par nos plaintes à la protection du Roy Le droit & la permission qui nous auoit esté octroyee de nous rassembler pour ce faire par des paroles si expresses & si solennelles. Le manquement & la contrauention aux promesses interuenu par la fraude de nos ennemis. Leur violence à nous empescher l'accez vers la Majesté de nostre Prince, & à faire ietter toutes nos requestes. L'iniustice de leur accusation, & le crime calomnieux de rebellion qu'ils nous imposent. Si on considere la desloyauté de leur procédure tandis qu'ils temporisent sur le refus de nous faire iustice; pour nous oster trois villes à la fois en Viuairez, sur la fraude d'un traité, & par



par la rupture de la foy publique. Enuahir tout le pays de Bearn contre vne stipulation si expresse & si pleinement accomplie de nostre part. Puis apres y commettre des actes d'hostilité si sanglans & si inhumains. Et finalement si on considere vne perfidie si infame, que sous la couuerture d'une Declaration autorisee du sacré nom du Roy, & verifiee dans tous les Parlemens de France, promettât seureté & liberté sous l'entretien des Edicts à tous ceux de la Religion qui demeureroient en obeissance, on se soit emparé de Saumur ou auectant d'obeissance & de respect les portes ont esté ouuertes, sous des promesses expresses & particulieres, (outre la foy publique de la Declaration) que rien ny seroit innoué. Que par vne mesme fraude & trahisō la ville de Iargeau au mesme temps a esté enuahie, celle de S. Iean attaquée, & maintenant en l'attente d'un siege. Tous ceux de la Religion desarmez par toutes les principales villes de Normandie pour les apprestier, hélas ! à vne plus facile boucherie à laquelle ils sont exposez. Si on considere disons nous toutes ces choses ensemble, nous ne doutons point nullement qu'on ne reconnoisse que nous souffrons cette persecution pour iustice, & en haine de nostre Religion, qu'une cōiuration vniuerselle par toute l'Europe menace aujourd'huy de destruire.

Pourtant estans reduits pour la liberté de nos consciences, & pour les affections de nostre patrie de chercher en nous mesmes, & vers les amis de nostre Religion & de cet estat, vne iuste & necessaire defense. Nous nous adressons encore icy avec larmes à Nostre Roy, le supplians en toute humi-

lité confiderer & croire, que les vœux & plus ar-  
 dens defirs, que nous espondons continuellement  
 vers Dieu en nos prieres, font pour la prosperité  
 de sa personne, & de son Estat. Et qu'il se souuienne  
 que nos peres, enseignez par leur Religion à la  
 vraye obeissancc deuë à leur Roy, ont abandonné  
 le soin de leurs propres vies, pour rendre vtils &  
 fructueux le soin & les labeurs de Henry le Grand,  
 à reconquerir ce Royaume perfidement vendu &  
 mis en proye à ses ennemis, par les mesmes pre-  
 textes de haine & de persecution contre nostre  
 Religion & nous. Et que par là il entende que  
 nous suiuan l'exemple de nos peres, heritiers de  
 leurs affections, n'auons iamais abandonné le de-  
 uoir de nostre naissance, ni refusé la vraye obeis-  
 sance, & le prompt seruice que nostre Reli-  
 gion nous apprend à luy rendre. Et que pleust  
 à Dieu, SIRE, que vostre Majesté poussee  
 des vrays interets de sa grandeur, & du mou-  
 uement naturel de sa generosité, voulust pour  
 l'affermissement de sa Couronne & dignité  
 de son Royaume, tourner ses armes contre les  
 ennemis de son Estat, & se seruir de nostre fi-  
 delité en la defense d'une telle cause. Nous ne  
 craindrons pas de dire de nous qu'en vne si glo-  
 rieuse emulation d'entre vos meilleurs subiects, la  
 palme n'en demeureroit point à d'autres. Mais  
 nous disons maintenant & pleurons avec larmes  
 de sang, & en amertume de sanglots qui deschirer  
 nos entrailles, que les ennemis de vostre Couron-  
 ne & de vostre personne, SIRE, vous ayans induit  
 à employer vos armes contre nous, & à les trem-  
 per au sang de vos plus fideles subiects, veulent



perdre & vostre Couronne & vostre personne tout ensemble. Ce sont vos vrais ennemis qui allument vostre haine contre nous, pour en embraser vostre Estat, & vous ensevelir en ses ruïnes. Qui ayans cruellement meurtri le plus grand Roy du monde vostre glorieux Pere, par ce qu'il ne nous haïsoit pas, & que sa bonté & sa iustice nous protegeoit comme ses fideles subiects: induisent auïourd'huy vostre Majesté à nous haïr & à nous destruire, pour l'accabler elle-mesme sous la cheute de cette Monarchie. Que si dans cet orage qu'ils ont desia excité & que nous sentons fondre sur nous, nous sommes contrainsts pour nostre propre defense & conseruation de recourir aux remedes naturels, nous protestons, SIRE, deuant Dieu, deuant vous, & deuant tous les hommes, que nostre intention est de conseruer tousiours vostre autorité & le respect de vostre obeïssance au milieu de nous, & que nous ferons tous nos efforts possibles pour sauuer de peril, vostre personne & vostre Royaume. Vueille le Tout-puissant, qui est le Dieu de vengeance & de grace, & qui selon les decrets de son conseil, tantost a fait tomber son ire en diuers exemples d'horreur sur les testes des Roys & des peuples mutinez contre luy. Tantost a preserué & conuertî à soy les plus animez contre son Eglise, vous donner, selon nos vœuz, que garanti de tous dangers vous puissiez recognoistre, la Religion & la fidelité des personnes que vous haïssez maintenant sans les cognoistre.

Cependant nous appellons icy par nos tres-humbles supplications tous les Rois Princes &

Estats interessez en l'innocence de bons & fideles  
 subiects opprimee, mais principalement obligez  
 eueurs Dieu à la defense de sa cause & de sa verité.  
 Et les requérons d'appuyer de leur secours & de  
 leur assistance, la foible defense que nous oppo-  
 sons par nécessité à tant de forces puissantes de nos  
 ennemis, qui ayât choisi ce tēps expres, apres qu'ils  
 ont allume le feu dans la pluspart des Estats, d'où ils  
 estiment que nous eussions peu attendre secours,  
 pensent nous opprimer maintenant avec plus de  
 facilité. Mais nostre confiance principale est au  
 bras du Tout-puissant, qui renuerse les desseins des  
 nations, & souffle sur l'entreprise des peuples con-  
 iurez contre son Israël. Et puis que pour la gloire  
 de son Nom nous sommes hays, & que pour ren-  
 uerfer sa verité on cherche nostre ruine, nous nous  
 asseurons qu'il nous fera sentir la mesme deliuran-  
 ce que nos peres ont esprouué de son secours, que  
 nous inuoquons du profond de nos ames. *Dieu ne  
 te tzen point coi, ne te tay point, & ne te repose plus ô  
 Dieu! car voicy tes ennemis brayent, & ceux qui te hayf-  
 ont leuè la teste.*

*C'est la Declaration des Eglises Reformees de France  
 & Souueraineté de Bearn, par leurs Deputez Assen-  
 blez à la Rochelle. Et pour tous.*

COMBORT,  
 BANAGE,  
 RODIL,  
 RIFFAVT,

President.  
 Adjoinct.  
 Secretaire.  
 Secretaire.



---

*RESVLTAT, OV RESOLVTION  
des Estats d'Angleterre, sur les plaintes  
des Eglises Reformees de France.*

**L**Es Communautéz Assemblees en Parlement, considerans serieusement le present estat des enfans du Roy hors le Royaume, & l'estat affligé en general de ceux qui és pays d'outre-mer, font veritablement profession de la mesme Religion Chrestienne, de laquelle faict profession l'Eglise d'Angleterre, & estans touchés d'un vif ressentiment & compassion de leurs destresses, comme membres d'un mesme corps. Declarent d'un consentement vnanime à sa Maiesté, & à tout le monde là dessus leur extreme desplaisir & marrissement de cœur, & se ioignent à eux non seulement en leurs tres-humbles & ardantes prieres à Dieu Tout-puissant, à ce qu'il protege son Eglise & destourne d'icelle les dangers dont elle est menacée : Mais aussi protestent solennellement de cœur & de bouche, que si les saints travaux de l'entremise de sa majesté pour procurer leur paix & seureté ne reüssissent point comme il est à desirer. En quoy sa Maiesté est suppliée de ne souffrir aucune longue remise. En tel cas toutesfois & quantes que sa Maiesté aura déclaré au Parlement son bon plaisir, ils se trouueront prompts pour secourir sa Maiesté de tout leur pouuoir, en y employant leurs vies & leurs moyens: Tellement que moyen-

nant l'ayde Diuine de Dieu Tout-puissant, qui ne  
manque iamais à ceux qui en sa crainte entrepren-  
nent la deffence de son Nom, il puisse faire par son  
espee, ce qui n'aura peu estre amené à chef par ses  
pacifiques procedures.

















